

lis Gnovis

FRIÛL. Aghis e... rogazions

Il nivel des aghis di falde dal teritori furlan al è un biel pocut di sot dal valôr de medie calcolade ogni an, ma dut câs al è ancjemò lontan di chel dal 2022, l'an dal grant sut e de grande sêt. La riduzion e je la consequence de pocje ploie che nus à bagnât dulinvie la Vierter di chest an. Il Consorzi di Bonifiche de Basse Furlane, che mai come cumò al è in vuaite, al sta monitorant cun cure la situazion che, a voli des previsions meteo, no fasin sperâ a nuie di bon. Di plui, a dî il vêr, a dan preocupazion lis aghis di superficje, come chês des rois, massime pe scjarsetât di aghe puartade dai flums, e par chest si proviodin benzà dai problemis, par esempli pes presis di Reane e di Aonedis, che a nudrissin diversis rois. Insumis, se la situazion no cjatarà un cualchi zovament dal cîl, oltri a sparagnâ la aghe – che no ‘ndi è mai avonde e vuai a strassâle – bisugnarà ricori, cemût che si faseve agnorums indaûr, aes rogazions. Ma ‘ndi sono, in di di vuê, predis e fedêi che a savedin cemût che si fasin?

RADIO PAR FURLAN. "Contis sot spirt" di Serafini

A son lis contis nassudis de fantasie di Raffaele Serafini (te foto), che cun lôr al à vinçût il premi leterari "Sant Simon" dal 2017. Si trate di contis che a tornin a fâ vivi oms, oparis e ativitâts di personaçs che vuê o ricuardin dome parcè che a àn dât il lôr non a scuelis dal Friûl. Lis contis a son stadis adadadis par l'imprest radiofonic di Serena Fogolini, la vòs e je chê, cetant cognossude, dal atôr Massimo Somaglini e lis musichis a son di Vittorio Vella. Lis trasmissions a van in onde di sabide, aes dôs mancûl vincj, te Rai regionâl.

RUVIGNE. Il Tiliment al torne indaûr une ancure dal 1917



La Prime vuere mondiâl, cundut che al è passât aromai plui di un secul, no finis di regalânus sorpresis, come chê de scuvierte, de bande di un citadin di Ruvigne, di une ancure dal 1917 di 200 kilos che, tirade sù dal flum cuntune pacare, e je stade metude tal Museu di Ruvigne, in spiete di jessi metude in sest. La ancure, cjatade des bandis di Ruvigne, e jere dute interie, e probabil che e fasès part de passarelis cun pontil di barçjis. Il puint al permeteve il passaç dal flum daspò che tal Novembar dal 1917 al jere stât fat saltâ il puint fat sù 11 agns prime. Secont altris, la ancure e sarès stade peade al sisteme di ancorament dal traghet che al permeteve il passaç dal flum prime de costruzion dal puint.

Miercus 8	S. Adrian III pape	Domenie 12	S.ts Ermacore e Fortunât
Joibe 9	S.te Veroniche	Lunis 13	Dedicazion de Basiliche di Aquilee
Vinars 10	S. Piu I di Aquilee pape	Martars 14	S. Camil di Lellis
Sabide 11	S. Benedet patron de Europe	Il timp	Cjaldon.



Il soreli
Ai 8 al jeve aes 5.25 e al va a mont aes 20.59.



La lune
Ai 14 Lune gnove.

Il proverbi
La bausie e ven parsore come il vueli.
Lis voris dal mès
Se al covente bagnât l'ort prin che si secji dut, ma no cun aghe glaçade o a trê bots dopomisdì, parcè che il risultât al podarès sei catastrofic.

Munistîrs e rinassite dal Friûl

Par sostignî la opare dai Patriarcjis – in massime part di riunde todescje – che si jerin impegnâts te ricostruzion de Basse planure furlane, la “Vastata Hungarorum”, daspò des tremendis invasions dai Ongjars dal 885 e dal 952, nol bastave vê clamât tancj colons slovens a ripopolâ i paîs devastâts par invî di gnûf la vite in chei teritoris. E coventave ancje une organizazion slargiade sul teritori, une organizazion inteligjente, ative e esperte, che ta chei tîmps e podeve jessi dome chê dai munistîrs, massime chei benedetins, che ancje Pauli Diacun a ‘ndi faseve part, e che e veve za dât prove di savê fâ par ben il so mistîr. Te seconde metât dal V secul al ven fondât, ae fôs dal Timâf, il munistîr di Sant Zuan in Tuba, che dulintor, in pôc timp, si jere dade dongje une popolose comunitât. Secont la liende, ta chel puest a logavin lis ombris dai Argonauts, che prin o dopo (si trate di une variante de storie dai trê durmients, ricuardade ancje di Pauli Diacun te version cristiane) a saressin stadis sveadis dal sun des trombis, o ben “tuba”, dai Agnui. Che po “tuba” in todesc si dis “tuben”, che al diventarâ “Duino”. Dopo al vignarâ fondât il munistîr di Sant Martin de Beligne, tra Grau e Aquilee, e daspò de sdrumade de citât, il vescul Marcelin al fasè sù une basiliche, e plui tart, li dongje, e fo fondade la abazie benedetine de Beligne, sierade a metât dal ‘400 par vie de malarie. Tal VIII secul trê fradis langobarts, Arfo, Marc e Anto, a fasin sù il munistîr benedetin feminil di Salt, su la rive de Tor, dulà che lôr mari Piltrude si ritirarâ fûr dal mont, e po dopo la abazie di Siest, chê di Sante Marie in Sylvis, dulà che ancje lôr si ritiraran a vivi une vite di munics. Tal secul daspò al nas un altri impuartant munistîr benedetin feminil, chel di Sante Marie di



La abazie di Rosacis, dulà che te sò grande cantine si messedavin vins che a jerin celebrâts dai leterâts dal timp

Intai munistîrs si insegnave al popul a coltâ il teren, a fâ cressi lis verduris, a semenâ, a fâsi di bessôi i imprescj che ur coventavin par fâ i lavôrs, a stâ insieme cence stiçâsi masse, cemût che a cirivin di fâ i munics, che no simpri a jerin farine di fâ ostiis

Aquilee, che si cjatave tal edifici dulà che vuê al è il Museu Paleocristian. Pai prins trê secui, lis muiniis a jerin todescjis, ma plui tart a poderin jentrâ ancje lis fantatis de nobiltât furlane. In chest convent, cundut che si tratave di un convent di clausure, massime tra il ‘400 e il ‘500, lis muiniis si jerin concuistade une certe libertât che e dave fastidi ancje al vicjari patriarchâl. A jesevin a fâ lis vendemis, e si trasferivin d’Istât tal munistîr di Cividât fin ae vilie di Ognissants, par vie che tal lôr al faseve masse cjalt, e po dopo ancje par vie de malarie, tant che lis lengatis a disevin che chês muiniis a fasevin sis mès di vacance par an... Infin, tal secul XI, e ven fondade la abazie plui famose e impuartante, chê di Rosacis, dulà che te sò grande cantine si messedavin vins che a jerin celebrâts dai leterâts dal timp, come i poetis de scuele di Sant Denêl, magari tra un sonet e un altri. La abazie e tignive dongje ancje lis contribuzions in nature dai colons. Ta chel lûc al florive ancje il

marcjât cun grande partecipazion di popul. Secont il storic Arduino Cremonesi, in chei tîmps a esistevin ancje grancj magazens, ma diferent di vuê chei a jerin dal clericât, mighe privâts. O podîn ricuardâ ancje la abazie di Mueç, famose ancje pal formadi, e il piçul convent di Raviei, innomenât pe sò cusine, e, plui tart, altris munistîrs a Udin e a Cividât. In ducj chescj munistîrs si insegnave al popul a coltâ il teren, a fâ cressi lis verduris, a semenâ, a fâsi di bessôi i imprescj che ur coventavin par fâ i lavôrs, a stâ insieme cence stiçâsi masse, cemût che a cirivin di fâ i munics, che no simpri a jerin farine di fâ ostiis. Insume, cui munistîrs la vite e scomence a gambiâ in miôr. Fale che cualchi volte, come tal câs di Rosacis, la gole di podê e la brame di bêçs a puartavin a tradî la regule; il pape Bonifazi IX al destitui l’abât Jacop di Perosa e al de in comende – in don di ûs – i beneficis a un gardenâl furlan, Pieri di Prate.

Roberto Iacovissi

Peraulis in dismentie

par cure di Mario Martinis

- > **IMBILIÂT**
agg. = adirato (participio passato di imbilâ ‘adirare, arrabbiare’, dal latino bilis ‘bile, rabbia’)
A ce zovial sei simpri imbiliâts?
A cosa serve essere sempre adirati?
- > **IMBOREÇÂT**
agg. = eccitato, euforico (participio passato del verbo imboreçzâ ‘eccitare, mettere in stato di euforia’, a sua volta o dal longobardo burrian ‘scovare la preda’ o per imitazione del suono di eccitazione borr)
In compagnie a son ducj imboreçâts.
In compagnia sono tutti euforici.
- > **IMBREVÎÂ**
v. = abbreviare (dall’italiano antico imbreviare ‘scrivere atti con abbreviazioni; registrare per intero’, a sua volta da breve, è attestato ne XIV secolo)
Imbrevie alc cussì al sta dut.
Abbrevia qualcosa così sta tutto.
- > **IMBRAMÎT**
agg. = aggranchito, intirizzito (participio passato del verbo imbramî ‘intirizzare, aggranchire’, da brumâl ‘inverno; invernale’, dall’aggettivo latino brumâlis ‘giornata più corta dell’anno’, da brûma)
Stant in spiete de coriere mi soi dut imbramît.
In attesa della corriera mi sono tutto intirizzito.
- > **IMBROI**
s.m. = imbroglio; trucco (dal francese brouiller, a sua volta dall’antico broueillier ‘mescolare’, che si collega a breu ‘sorta di brodo’)
Sì sin cjatâts intun biel imbroi.
Ci siamo trovati in un bell’imbroglio.
- > **IMPAÇÂ**
v. = impicciarsi (dal latino impedîcare, da confrontare con il francese empeechier, il provenzale empachar)
No vœi impaçâmi tai tiei afârs.
Non voglio impicciarmi nelle tue questioni.